

[Augsburg], 10. Dezember 1560

An Johannes Oporinus

UB Basel, Fr. Gr. I 11, fol. 364r-v + 238r.  
Steinmann Nr. 729.

S. Itineribus, negocijs, valetudine impeditus ab Idibus Septembbris in hunc vsque diem Epictetum meum ne aspexi quidem. Quare mittere nihil possum vsque ad vernalis nundinas. Ad quas totum opus (nisi fata conatibus meis obstiterint) perfectum et perpolitum accipies. Etsi autem antehac et saepius et diligenter totius operis rationem ad te scripsi, et ea te memoria esse scio, vt talia tibi nequaquam excidant, praesertim cum ad literas meas recurrere liceat: tamen vt τοῖς ῥητορεύμασί σου satisfiat, dubitantis opinor, an mihi constem, aut alioqui tergiuersantis et haec puerilia contemnentis: eandem cantilenam canam.

1. Totum opus in 3. tomos distribui vellem enhiridij forma 16<sup>ta</sup>, vt circumferri et in sinu gestari posset.
2. Quemlibet tomum seorsim excudi, et primum graecolatinum esse, vt Isocrates noster excusus est. Eum tu habes integrum et absolutum vnā cum praefatione, neque quicquam suspicari possum, quòd te quò minus excudere caeperis, praeter voluntatem tuam impedierit, de qua si dubitassem, facile alium typographum inuenissem. Et nunc etiam a te peto, vt opusculum hoc aut ad Cal[endas] Martias in publicum prodeat, aut mihi quam primum remittatur, quod nolim hunc faetum mihi esse posthumum. De caeteris duobus tomis minus labore, etiamsi post obitum meum demum editi fuerint, aut etiam inobscuro delituerint, vnā cum alijs lucubratiunculis meis, inchoatis illis quidem sed nunquam absoluendis, edendis verò multo minus. De forma decima sexta non magnopere labore, facile etiam patior, graeca in fine subiungi vnā cum meis annotationibus. In contextu graeco nihil muto, etsi non omnia probo. quae autem improbem enotaui diligenter. In enhiridio igitur sequeris editionem tuam anni 155. In tabula Cebetis itidem editionem tuam Constantini Lascaris anni 1547. cuius errata ex annotationibus meis, vbi etiam paginae et versus (si rectè memini) notati sunt, corrigas licebit. Hunc igitur primum tomum hoc trimestri hyberno citra negocium absolues, idquē vt facias, nec extrellum conatum hunc meum destituas, etiam atque etiam oro. Nec refert etiamsi primi tomi inscriptio addita fuerit. Primus enim (si iurisconsultuis qui tibi nunc animos faciunt, credendum est) rectè is etiam dicitur, quem nemo sequitur, neque nouum tibi scilicet ac nobis potius est plura polliceri quam praestare. Fecere hoc multi alij, aequè boni, et iustum habet excusationem fortunae iniquitas et immaturus obitus. οὐδὲν μὲν ἀπλῶς, ἀλλ' ἀπαντά ἡμῶν ὑποθετικῶς ἐπαγγειλαμένων.
3. Secundus tomus Simplicij commentarios et alias Stoicorum sententias continebit.
4. Tertius et extremus Arriani commentarios, quos te inchoare nolim priusquam totum opus acceperis. Librum primum vnā cum praefatione iampridem ad te misi. Simplicius et Arriani reliqui libri sequentur ὅν θεὸς ἐθέλῃ ad proximas nundinas. Decreui enim quicquid ocij valetudo et seruitus mihi concesserint, id vniuersum impendere Epicteto.

De Gregora nihil adhuc impetraui. Differtur responsum, nec Willerus quicquam soluit cuius ad te literas mitto. Vale et Enchiridion imprime tuo arbitratu, modò imprimas.

De Postello aliàs, Nunc vrget tabellarius, et Pomgartnerus mihi vacare non potuit. Vale. 10 Decembr[is] 1560.

Hieronymus Wolfius

Tuus.

Graecos meos codices ad te mittam vbi totum Epictetum absoluere. Interim vero ijs carere non possum. Resscribe quaeso, et aut specimen enchiridij aut ipsum enchiridion mitte, aut expecta Wolfianum enchiridion οὐ μέντοι συγγραφικὸν ἀλλὰ στρατιωτικὸν. Nostι tu quidem τὸν ἔμοῦ θυμὸν ἀγήνορα, si dijs placet.